

SILA SEMAK SEMASA UCAPAN



**KEMENTERIAN SUMBER ASLI
DAN KELESTARIAN ALAM**

TEKS UCAPAN

**NIK NAZMI NIK AHMAD
MENTERI SUMBER ASLI DAN KELESTARIAN ALAM**

SEMPENA

PROGRAM GAYA HIDUP HIJAU BERSAMA KOMUNITI LABUAN

5 MAC 2024 (SELASA)

DEWAN 197, TAMAN PERTANIAN KILAN, LABUAN

Assalamualaikum Warahmatullahi Wabaraktu, Salam Sejahtera dan
Salam Malaysia Madani

Yang Berbahagia Dr. Ching Thoo a/l Kim

Ketua Setiausaha Kementerian Sumber Asli dan Kelestarian Alam

Yang Berusaha Puan Marysia Modingin

Pengarah Jabatan Pertanian Wilayah Persekutuan Labuan

Yang Berbahagia Dr. Nurul Muiz Murad

Ketua Pegawai Eksekutif Yayasan Hijau Malaysia

Puan Mimie Duasah,

Presiden Persatuan Wanita Tani Labuan

Pegawai-Pegawai Kanan Kementerian dan Agensi di bawah
Kementerian,

Pegawai-Pegawai Kanan Agensi Kerajaan Wilayah Persekutuan Labuan,

Tuan-tuan dan Puan-puan serta para hadirin sekalian,

1. Terlebih dahulu saya ingin merakamkan penghargaan dan terima kasih kepada Jabatan Pertanian Labuan di atas kesudian menjadikan lokasi Taman Pertanian Kilan Labuan sebagai lokasi penganjuran 'Program Gaya Hidup Hijau Bersama Komuniti Labuan' pada hari ini.

Saya amat berbesar hati kerana pada hari ini saya berpeluang untuk bersua muka dan beramah mesra dengan masyarakat di Labuan. Terima kasih juga diucapkan atas kehadiran semua pihak serta sokongan dan kerjasama dalam menjayakan program ini.

Hadirin yang dihormati sekalian,

2. Mungkin masih ada lagi dalam kalangan komuniti kejiranan kita yang masih belum menghayati sepenuhnya apa yang dimaksudkan dengan konsep Gaya Hidup Hijau yang cuba diketengahkan oleh pihak Kerajaan pada ketika ini. Secara umumnya, idea mempromosi gaya hidup hijau ini meliputi cara hidup yang mesra alam sekitar. Ia merangkumi aspek mengurangkan impak terhadap alam ini, di samping meningkatkan tahap kesihatan, kebahagiaan dan produktiviti masing-masing. Ia bukan sahaja bermanfaat untuk kesejahteraan bumi kita, bahkan untuk diri sendiri dan masyarakat secara keseluruhannya.

3. “Gaya Hidup Hijau” mempunyai makna yang luas tetapi boleh disimpulkan sebagai cara tertentu seseorang individu atau sesuatu kumpulan menjalani kehidupan dengan menekankan penjagaan atau usaha dalam memelihara alam sekeliling.

4. Dalam hal ini, kita boleh menjadi duta hijau di kawasan komuniti atau kejiranan dalam menarik lebih ramai masyarakat membudayakan amalan gaya hidup hijau demi kelestarian alam sekitar. Sesungguhnya setiap tindakan positif walau sekecil mana pun jika dilaksanakan secara kolektif pastinya akan membawa sesuatu yang lebih hijau dan lebih lestari di masa hadapan.
5. Kini, kesan perubahan iklim semakin dirasai. Justeru itu, ia memerlukan kita semua untuk melakukan satu anjakan paradigma. Sesungguhnya, ada pelbagai ruang dan peluang untuk menyemai dan membudayakan amalan gaya hidup hijau secara individu, baik di tempat kerja mahupun di kawasan kejiranan kita.

Para hadirin sekalian,

6. Bagi membolehkan kita mencapai apa yang dirancangkan, perubahan minda atau “*mindset change*” perlu dilakukan bermula daripada sekarang. Amalan gaya hidup hijau ini penting untuk ditanamkan melalui pendidikan, baik formal atau tidak formal dalam memastikan usaha untuk memelihara alam sekitar dimulakan daripada generasi muda dan ketika di bangku sekolah lagi.

7. Aspek amalan gaya hidup hijau ini boleh diajar kepada anak-anak kita sejak mereka kecil lagi melalui amalan mudah setiap hari di rumah seperti menjimatkan penggunaan air, mengumpul sisa organik untuk menghasilkan baja kompos, mengasingkan sampah-sarap, mengamalkan konsep 3R iaitu *reduce*, *reuse* dan *recycle* serta mengurangkan penggunaan beg plastik.
8. Dalam usaha membangun dan menyediakan kemudahan serta prasarana untuk kemakmuran dan kesejahteraan rakyat, adalah penting bagi kita untuk turut mengamalkan gaya hidup lestari. Membudayakan amalan hidup hijau hendaklah bermula dan diterapkan dalam setiap individu di rumah.
9. Pengetahuan tentang amalan gaya hidup hijau dalam kehidupan seharian perlu dikongsi bersama-sama di semua peringkat masyarakat bermula daripada usia yang masih muda. Bak kata pepatah, “Melentur buluh biarlah dari rebungnya”. Antara langkah-langkah mudah yang boleh diberi perhatian dan dilaksanakan oleh masyarakat setempat di sini adalah dalam menguruskan sisa pepejal (sampah) secara sistematik serta dengan mengamalkan kitar semula.

10. Selain itu, penggunaan air dan elektrik dengan lebih cekap dan berhemah juga adalah penting demi menjaga dan menghargai sepenuhnya sumber seperti air, tenaga elektrik dan udara bersih. Amalan sebegini, walaupun nampak kecil, secara tidak langsung akan membantu kita dalam mengurangkan kos sara hidup seterusnya memberi penjimatan ke atas bil utiliti bulanan kita. Selain itu, menerusi penggunaan aplikasi cekap tenaga dan air seperti lampu-lampu cekap tenaga atau LED, pemasangan panel solar bagi tujuan penjanaan tenaga elektrik daripada sumber tenaga boleh baharu serta pemasangan sistem pengumpulan air hujan (*rain water harvesting system*) juga boleh dipertimbangkan oleh masyarakat setempat bagi mengurangkan kos utiliti yang kian meningkat.

11. Perkara ini walaupun nampak kecil atau remeh, jika dijadikan sebahagian amalan atau gaya hidup mampu memberikan sumbangan secara positif kepada usaha untuk melestarikan alam sekitar.

12. Kita sebagai rakyat Malaysia seharusnya menerapkan dalam diri kita dengan menitikberatkan isu kelestarian dalam apa jua tindakan kita. Ini sekaligus dapat mempromosi pelbagai amalan-amalan gaya hidup hijau agar menjadi ikutan kepada individu atau kumpulan masyarakat yang lain.

Tuan-tuan dan puan-puan sekalian,

13. Dengan adanya penganjuran program Gaya Hidup Hijau ini, adalah diharapkan agar kita dapat menggerakkan usaha-usaha besar penjagaan alam sekitar dan sesebuah komuniti setempat harus bertindak dengan mempraktikkan amalan gaya hidup hijau, terutamanya daripada segi aspek pengurusan sisa yang kita hasilkan secara individu. Bermula daripada inisiatif yang sedikit, usaha kecil ini bila dikumpulkan akan dilihat sebagai besar.

14. Saya telah dimaklumkan salah satu aktiviti pada hari ini adalah penganjuran bengkel pembuatan kraf yang telah diadakan pada awal pagi. Menerusi inovasi dan kreativiti ke atas bahan terbuang seperti *banner*, bekas plastik, pakaian terpakai dan sisa-sisa kebun, kita boleh menghasilkan produk eko seperti beg, kraftangan dan barang hiasan hanya berbekalkan modal yang rendah. Usaha seumpama ini berupaya menjana pendapatan baharu daripada sisa atau bahan terbuang yang dikategorikan sebagai *waste to wealth*.

Para hadirin sekalian,

15. Selaras dengan Pelan Hala Tuju Kelestarian Plastik Malaysia 2021-2030, Kementerian komited untuk menggalakkan mekanisme alternatif dan bahan lestari dalam pengeluaran plastik selain giat mengambil inisiatif untuk menghindari penggunaan plastik sekali guna yang bermasalah. Pada masa sama, Kementerian sentiasa menggalakkan seramai mungkin pemain industri untuk beralih kepada penggunaan plastik yang lebih mesra alam. Di sinilah kita selaku warganegara yang bertanggungjawab juga haruslah peka dan bertindak untuk tidak menggunakan plastik sekali guna dalam urusan seharian kita.

Tuan-tuan dan puan-puan sekalian,

16. Kehidupan dan teknologi tidak dapat dipisahkan. Penggunaan peranti mudah alih seperti telefon bimbit telah digunakan secara meluas. Walau bagaimanapun, masyarakat masih perlu sedar akan kesan barang elektronik ini jika tidak dilupuskan dengan betul. Jika sisa elektronik dibuang tanpa mengguna pakai kaedah pelupusan yang mesra alam seperti di buang ke dalam sungai, tapak pelupusan, dibakar secara terbuka atau diberikan kepada pihak yang tidak bertanggungjawab, sisa elektronik ini berupaya untuk membahayakan kehidupan, menjelaskan kesihatan kita dan menyebabkan kemerosotan kualiti alam sekitar.

17. Berdasarkan kajian, dijangkakan sebanyak 24.5 juta unit e-waste akan dihasilkan di Malaysia menjelang tahun 2025. Oleh yang demikian, kita haruslah cakna tentang pelupusan e-waste dengan kaedah yang telah ditetapkan oleh Kerajaan bagi menjamin kesejahteraan kehidupan dan kelestarian alam sekitar

Para hadirin sekalian,

18. Sekiranya kita sebagai seorang rakyat Malaysia yang bertanggungjawab mampu untuk menormalisasikan amalan gaya hidup hijau sebagai sebahagian daripada diri kita, sudah tentulah kejayaan penganjuran program seperti ini boleh diaplikasikan di mana-mana sahaja kita berada. Harapan saya agar anak-anak kita boleh kekal hidup dalam suasana yang harmoni dan disokong dengan persekitaran yang kondusif.

19. Akhir sekali, saya ingin mengucapkan terima kasih kepada Jabatan Pertanian Labuan, Yayasan Hijau Malaysia, Persatuan Wanita Tani Labuan, Perbadanan Labuan, Suruhanjaya Koperasi Malaysia, Koperasi Wanita Labuan, Persatuan Komuniti Labuan Geopark, Belia Advent Cabang Patau-Patau serta semua pihak yang terlibat dan telah bertungkus-lumus dalam menjayakan program pada hari ini.

20. Adalah menjadi harapan saya agar penganjuran program ini yang akan diteruskan sepanjang tahun akan diterima baik oleh setiap kelompok komuniti yang telah diamanahkan untuk menjaga kelestarian khazanah alam ini. Semoga kehadiran dan penglibatan tuan/puan pada hari ini berjaya mencapai objektif dan matlamat program ini.
21. Dengan itu, saya sudahi ucapan saya ini dengan lafaz Wabillahi Taufiq Wal Hidayah, Wassalamualaikum Warahmatullahi Wabarakatuh. Sekian, terima kasih.